

佛说无常经 1 卷

No. 801

◎佛说无常经(亦名三启经)

大唐三藏法师义静奉 制译

◎稽首归依无上士，常起弘誓大悲心，  
为济有情生死流，令得涅槃安隐处。  
大舍防非忍无倦，一心方便正慧力，  
自利利他悉圆满，故号调御天人师。  
稽首归依妙法藏，三四二五理圆明，  
七八能开四谛门，修者咸到无为岸。  
法云法雨润群生，能除热恼蠲众病，  
难化之徒使调顺，随机引导非强力。  
稽首归依真圣众，八辈上人能离染，  
金刚智杵破邪山，永断无始相缠缚。  
始从鹿苑至双林，随佛一代弘真教，  
各称本缘行化已，灰身灭智寂无生。  
稽首总敬三宝尊，是谓正因能普济，  
生死迷愚镇沈溺，咸令出离至菩提。

生者皆归死，容颜尽变衰，  
强力病所侵，无能免斯者。  
假使妙高山，劫尽皆坏散，  
大海深无底，亦复皆枯竭，  
大地及日月，时至皆归尽，  
未曾有一事，不被无常吞。  
上至非想处，下至转轮王，  
七宝镇随身，千子常围遶，

如其寿命尽，  
还漂死海中，  
循环三界内，  
亦如蚕作茧，  
无上诸世尊，  
尚舍无常身，  
父母及妻子，  
目观生死隔，  
是故劝诸人，  
共舍无常处，  
佛法如甘露，  
一心应善听，  
须臾不暂停，  
随缘受众苦。  
犹如汲井轮，  
吐丝还自缠。  
独觉声闻众，  
何况于凡夫。  
兄弟并眷属，  
云何不愁叹。  
谛听真实法，  
当行不死门。  
除热得清凉，  
能灭诸烦恼。

如是我闻：

一时薄伽梵在室罗伐城逝多林给孤独园。尔时佛告诸苾刍：「有三种法，于诸世间是不可爱、是不光泽、是不可念、是不称意。何者为三？谓老、病、死。汝诸苾刍，此老病死于诸世间实不可爱、实不光泽、实不可念、实不称意。若老、病、死世间无者，如来．应．正等觉不出于世，为诸众生说所证法及调伏事。是故应知此老、病、死，于诸世间是不可爱、是不光泽、是不可念、是不称意。由此三事，如来．应．正等觉出现于世，为诸众生说所证法及调伏事。」

尔时世尊重说颂曰：

「外事庄彩咸归坏，  
唯有胜法不灭亡，  
此老病死皆共嫌，  
少年容貌暂时住，  
假使寿命满百年，  
老病死苦常随逐，  
内身衰变亦同然，  
诸有智人应善察。  
形仪丑恶极可厌，  
不久咸悉见枯羸。  
终归不免无常逼，  
恒与众生作无利。」

尔时世尊说是经已，诸苾刍众、天、龙、药叉、捷阇婆、阿苏罗等，皆大欢喜，信受奉行。

◎

◎常求诸欲境，不行于善事，  
云何保形命，不见死来侵？  
命根气欲尽，支节悉分离，  
众苦与死俱，此时徒叹恨。  
两目俱翻上，死刀随业下，  
意想并悻惶，无能相救济。  
长喘连胸急，短气喉中干，  
死王催伺命，亲属徒相守。  
诸识皆昏昧，行入险城中，  
亲知咸弃舍，任彼绳牵去。  
将至琰魔王，随业而受报，  
胜因生善道，恶业堕泥犁。  
明眼无过慧，黑闇不过痴，  
病不越怨家，大怖无过死。  
有生皆必死，造罪苦切身，  
当勤策三业，恒修于福智。  
眷属皆舍去，财货任他将，  
但持自善根，险道充粮食。  
譬如路傍树，暂息非久停，  
车马及妻儿，不久皆如是。  
譬如群宿鸟，夜聚旦随飞，  
死去别亲知，乖离亦如是。  
唯有佛菩提，是真归仗处，  
依经我略说，智者善应思。

天阿苏罗药叉等，来听法者应至心，  
拥护佛法使长存，各各勤行世尊教。  
诸有听徒来至此，或在地上或居空，  
常于人世起慈心，昼夜自身依法住。  
愿诸世界常安隐，无边福智益群生，  
所有罪业并消除，远离众苦归圆寂。  
恒用戒香涂莹体，常持定服以资身，  
菩提妙华遍庄严，随所住处常安乐。

## 佛说无常经

若苾刍、苾刍尼，若邬波索迦、邬波斯迦，若见有人将欲命终，身心苦痛。应起慈心，拔济饶益。教使香汤澡浴清淨，着新净衣，安详而坐，正念思惟。若病之人自无力者，余人扶坐。又不能坐，但令病者右肋着地，合掌至心，面向西方。当病者前，取一淨处，唯用牛粪香泥涂地，随心大小。方角为坛，以华布地，烧众名香，四角燃灯。于其坛内悬一彩像，令彼病人心心相续，观其相好了了分明，使发菩提心。复为广说三界难居，三涂苦难非所生处，唯佛菩提是真归仗。以归依故，必生十方诸佛刹土，与菩萨居，受微妙乐。

问病者言：「汝今乐生何佛土也？」病者答言：「我意乐生某佛世界。」时说法人，当随病者心之所欲，而为宣说佛土因缘、十六观等，犹如西方无量寿国，一一具说，令病者心乐生佛土。为说法已，复教谛观，随何方国，佛身相好。观相好已，复教请佛及诸菩萨，而作是言：「稽首如来。应。正等觉，并诸菩萨摩訶萨，愿哀愍我，拔济饶益。我今奉请，为灭众罪；复将弟子，随佛菩萨生佛国土。」第二第三亦如是说。既教请已，复令病人称彼佛名。十念成就，与受三归，广大忏悔。忏悔毕已，复为病人受菩萨戒。若病人困不能言者，余人代受及忏悔等。除不至心，然亦罪灭得菩萨戒。既受戒已，扶彼病人北首而卧、面向西方，开目闭目谛想于佛三十二相、八十随形好，乃至十方诸佛亦复如是。又为其说四谛因果、十二因缘无明老死、苦空等观。

若临命终，看病余人但为称佛，声声莫绝。然称佛名，随病者心称其名号，勿称余佛，恐病者心而生疑惑。然彼病人命渐欲终，即见化佛及菩萨众，持妙香花来迎行者。行者见时便生欢喜，身不苦痛、心不散乱，正见心生如入禅定，寻即命终，必不退堕地狱、傍生、饿鬼之苦。乘前教法，犹如壮士屈伸臂顷即生佛前。

若在家邬波索迦、邬波斯迦等，若命终后，当取亡者新好衣服及以随身受用之物，可分三分，为其亡者将施佛陀、达磨、僧伽。由斯亡者业障转尽，获胜功德福利之益。不应与其死尸着好衣等将以送之。何以故？无利益故。若出家苾刍、苾刍尼及求寂等，所有衣物及非衣物，如诸律教，余同白衣。

若送亡人至其殡所，可安下风，置令侧卧，右肋着地，面向日光。于其上风，当敷高坐，种种庄严。请一苾刍能读经者升于法座，为其亡者读无常经。孝子止哀勿复啼哭，及以余人，皆悉至心为彼亡者烧香散花，供养高座、微妙经典及散苾刍，然后安坐，合掌恭敬一心听经。苾刍徐徐应为遍

读。若闻经者，各各自观己身无常，不久磨灭，念离世间，入三摩地。读此经已，复更散花烧香供养。又请苾刍随诵何呪，呪无虫水满三七遍，洒亡者上。复更呪净黄土满三七遍，散亡者身。然后随意，或安窆堵波中，或以火焚，或尸陀林乃至土下。

以此功德因缘力故，令彼亡人，百千万亿俱胝那庾多劫，十恶、四重、五无间业、谤大乘经一切业报等障，一时消灭。于诸佛前获大功德，起智断惑，得六神通及三明智，进入初地。游历十方，供养诸佛，听受正法，渐渐修集无边福慧。毕当证得无上菩提，转正法轮度无量众，趣大圆寂成正觉。

## 临终方诀

---

【经文信息】大正藏第 17 册 No. 0801 佛说无常经

【版本记录】CBETA 电子佛典 Rev. 1.17 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，阎学新大德输入，北美某大德提供，三宝弟子提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---